


蜀
輶
日
記



日知錄

陶雲汀太史著

長樂梁章鉅題



蜀輶日記序

憶庚午西蜀之役距今十有五年矣其時余與雲汀中丞俱官編修平日詩酒過從形骸無間及星輶同馭昕夕依倚交日益親故往返萬餘里不知征途之瘁也余夙有目疾畏風日之侵倦于觀覽卽至驛亭亦靜坐之時居多中丞則於一山一水一祠宇一橋梁無不考其名究其源委訪之士人參以傳記今事古事條列井井齊澣仲舒合爲一手矣蓋中丞撐胸萬卷逸氣盤礴遇有觸發如懸鼓待槌聲應不窮故所過名蹟皆形爲咏歌歸後編次成集藝林傳播已久是編於撫皖時始付

蜀輶日記史序

一

剗刷以余爲昔年共事屬爲序之夫雪泥爪印回首茫然妙墨紗籠陳迹偏在記中丞於己卯歲觀察川東余聞而羨焉以爲舊遊重到山光樹色一如故友忽逢最是人生奇遇今覩是編也道里關河髣髴憶之以是爲余之舊遊重到可矣道光四年季春樂陵史評

序

蜀輶日記四卷大中丞陶雲汀先生庚午典試四川與中所輯也會余主講皖城先生以其書示余俾序之惟古稱登高能賦可以爲大夫然輶軒之使不徒能賦而已也凡山川之經緯形勢之險易建置之沿革郡邑之利弊古今之事蹟無不當講明而切究之至傳聞異詞每不逮所見之確必履其地始可以指諸掌而折其衷此皇華之詩所爲有取於諏謀度詢也蜀地在坤維井絡古梁州之域去京師七十七驛往則道冀雍回則由荆豫水陸往返幾於身行萬里半天下矣先生以輶車

蜀輶日記龔序

二

言邁星郵信宿觸目關心軫量今古故若褒斜陳倉劍門雲棧秦漢之所經營棘道符關夔門峽口雄豪俊傑出奇制變因勢乘便之所戰守旣爲之審其道路紀其要害可燭照而數計而且考證江山時出卓見以發前人之覆如謂大渡河與江同源而復合爲禹貢旣道之沱謂嘉陵江爲梁州貢道逾沔入渭之潛謂山海經之洞庭九江卽禹貢荊州之九江而以離騷陵陽南渡爲東陵之證謂雍梁各有黑水而以盤江之出黔中者爲入南海之黑水皆考核精詳確有根據俾一切穿鑿附會之說昭若發矇至九穴十三口之塞而謂其自潰隄

防白河之功不成而謂其不識地脈則又寓經濟於考
索之餘者也使非具上下千古之識而復窮極七略之
源流洞悉三幹之脈絡烏能本末兼該如是是豈游目
騁懷者所得擬其萬一哉先生所爲蜀道詩久已風行
宇內卽茲行秘書中吉光片羽而精切不苟如此以視
范至能吳船錄陸務觀入蜀記彼誠未足多矣

道光四年歲在閏逢涸灘日躔壽星之次館侍陽湖龔
鏜拜撰

蜀輶日記書後

九能之士是說山川百家之流特重輿地述征撰行作者所由斐然也至於皇華原隰並入諏諮同於誦訓形方藉知謠俗魁能碩彥尤加意焉夫耳目所構皆關性靈語言所抒惟資神理而研詞者騁詭麗侈博者矜遠奧考据者逐細碎夸論者耽新奇鶩於一途通之則窒固才力之偏至實神明之寡要耳 中丞陶公此書矩步前規作非創始而奧窔自闢獨寓風裁通和味宜服之嗜欲苞廣谷大川之氣勢宣政治弛張之所當究古今成敗之所原又探本禹跡疏通桑鄜經生之所聚訟

蜀輶日記書後

四

形家之所揣摩片言洞微萬結立解詞表纖旨經百思而愈深言中鴻律俟千載而不惑此豈與夫鬻聲釣世者同日語哉性靈淪則覃思咸茹神理超則虛塵皆吐也然則 公之所以經緯彛憲陶甄羣生因俗以成化開物而成務者略可見於此綴學之徒窺美富而末由挹淵襟而覺潤其爲沾溉不亦多乎

道光七年閏五月武進李兆洛識

大夫九能皆辭命之事中有山川能說則尤經濟所關也蓋必審其脈絡知其險易及其水利導防風土人情之所宜一一瞭如指掌然後謂之能說以是而爲大夫必能以所親歷施之政教而裨於實用非徒如登高能賦而已是以原隰周咨歸備顧問輜軒之使尤重之然非畱心民物優於學識茲事亦談何容易中丞陶公雲汀先生今之偉人也昔與益同官諫垣寓邸相比鄰數過從每讀其奏章聽其言論輒肅然敬服比游歷方面開府皖江政聲日以懋近移節江蘇而益適以學使按試金陵從容話舊因得讀其蜀輜日記蓋先生典試時

蜀輜日記序

五

所輯者於所過山川道里疆域旣詳悉如繪至於引據經史折衷已見博而能精勝覽郡邑諸地志且於古來設防守險成敗得失之由言之洞然此可見先生之志與其學矣抑益竊有感焉益嘗南使八閩東使二東西使三秦北使遼瀋二京乘輅所歷游蹤所至山如岱嶽太華醫巫閭水如東海大凌河淮江漢洞庭彭蠡鄱陽關隘如仙霞潼關長城名勝之區都會之地所閱歷不爲少矣雖亦嘗各爲日記然於山脈水源古今疆域之分合與其實事未暇一一深考也旅中旣鮮書籍偶有所憶無從辨證詢之士人言或互異坐此廢然比歲役

言歸則并日記度之高閣不復尋繹以此出游雖覽徧
嶽瀆何益以此奉使其負輜軒多矣卽如先生日記中
自燕趙而晉而秦綿水柏井堯城韓侯嶺諸地渭水華
陰溫泉繡嶺諸名勝皆益西使時所經今一披讀宛若
重游其能如先生述之詳而考之精哉因此歎善學者
用心之誠而悔益向者嗜懶憚煩而學終無所就也先
生近以糧艘阻滯建河海並運策蒙

聖主俞允又以海運所急在海船甫履任卽躬詣上海
悉召海商諸舶曉以大義假以便宜婉切勸諭之海商
悉踴躍聽命蓋其所至皆相度時勢愜物情故事無不

蜀輜日記序

六

集卽輜記一書已可想見由其畱心民物學之優而意
之誠也夫伯益掌火通山澤而佐禹成功張安世畫地
成圖馬伏波聚米爲山而宏炎劉之業悉由平日精審
山川形勢所致豈第如後人游記存名跡爲風雅談論
資已乎吾願讀是書者卽以作先生經濟觀可也道光
乙酉中秋日同館愚弟辛從益拜手謹序

蜀輶日記後序

右蜀輶日記四卷吾師長沙公主考四川塗次之所輯也謹按小雅皇皇者華之首章駢駢征夫每懷靡及毛傳訓懷爲和鄭箋以和爲私字之誤言受君命當速行不得懷私相稽留其說頗隘夫君言不宿使臣之恒節何足復相勗勉靡及云者深慮德澤有所未被聲教有所不達馳驅況瘁之暇又當採風謠問疾苦以爲歸朝之獻故以下四章咨諏咨謀咨度咨詢如此其辭繁不殺蓋聖主賢君所望於其臣有出於使事之外者卽箋所謂揚君之美延其譽於四方猶未足以盡此詩之旨

蜀輶日記後序

一

也今館閣諸公間三歲一出典直省試其返命也征塗所經置吏賢否年穀豐歉清問所及至周至悉而豈徒峻關防勤校閱以是爲盡心焉爾哉吾師自翰林遷御史給事中屢上封事爲睿廟所嚮用

今上登極遂膺封圻之寄或徒見受任之逾等而不知公之所自命與其所學蓄積於文學待從之日者爲已久也公著述繇富是書裁五萬餘言而建置之沿革郡邑之利病民氣之淳澆山川形勢之險易道里之遠近源流本末粲然畢具夫造

邾沃

心之語外庭不得聞然而咨謀詢度之詳慎書思對命之所取資於此已略可識矣使繼輅早得而讀之或卽能窺見吾師天下已任之志惜受知較晚乃言之於已然爲可慙也道光四年十月受業陽湖陸繼輅書後

蜀輶日記後序

二

跋

右蜀輶日記四卷吾師

雲汀老夫子典試四川時記往返之程途城邑之閱歷與夫山川之形勝民生之利病人物古蹟之所流傳而溯其源委正其譌誤蓋與皇華集數百篇同一時作而各自成伏昔太史公西至崆峒北過涿鹿東漸於海南被江淮而文章益奇杜陵入秦歷蜀出瞿唐下江陵泝沅湘以登衡山而詩益工彼蓋借助於名山大川以發其胸中浩瀚無涯之氣而適得如其意之所欲言亦各有取爾也壬午之夏吾師曾以皇華集見示旣得受而

蜀輶日記跋

三

讀之今復得讀此記四卷始知古人之偏長獨至尙有不足言者他日得有餘暇將合而刻之以貽惠後來受業涇縣趙紹祖謹跋

序

雲汀中丞述職北來示所撰蜀輶屬爲序余意此石湖
吳船錄放翁入蜀記類耳及受而讀之山川之險易民
俗之淳澆古今之戰守成敗引端觸緒靡不賅備而如
九江如潛漢如梓潼豐都諸所糾擿皆足以闡經訓而
扶世教卓哉乎商霖甫衮之經濟見於此矣宜其蒞吾
皖而頌聲作也豈范陸二公所能頡頏哉中丞方有省
志之輯大理物博嘉惠吾枌梓良厚余又必其書之垂
世而行遠也欣然泚筆而書之道光乙酉春古歙鮑桂
星拜識

雲汀中丞閣下承示尊著蜀輶日記四卷命序其端謹
伏而讀之體大思精迥非尋常說部可與倫比前有樂
陵史松軒陽湖龔聲甫陸祁生三序中惟龔序能道閣
下纂輯之意但其云考證江山時出卓見者舉沱潛九
江黑水數條爲例而未實尋其根據之所在恐閱者疑
近於阿瑋請得卽此而申論焉案禹貢之沱有二一在
梁州一在荊州而梁州又有二漢書地理志郫下曰禹
貢江沱在西東入江又汶江下曰江沱在西南東入江
此皆梁州沱也郫縣之沱水道提綱以爲合北來綿維
諸水至瀘州入江曰中水閣下前出新都南門渡小毘

蜀輶日記朱書

一

橋水謂卽沱之分而沱水之爲中水者固已甚明至汶
江之沱近段茂堂注許氏說文謂尙當在其上流未審
今何水孫淵如亦云今無水顧欲以保縣玉輪江當之
而不言別出復入之由意涉顛預考說文泚下云泚水
出蜀汶江徼外東南入江而漢志蜀郡青衣下云大渡
水東南至南安入泚汶江下云泚水出徼外南安東入
江蓋漢志之泚卽說文之泚泚从彘字形近我段君据
玉篇泚與江沱聯屬又水經注引呂忱曰泚水出蜀許
慎以爲泚水知今本說文爲譌閣下謂傳寫之誤是也
汶亦卽岷之假借字泚水旣出汶江源本與江同而尾

又入江則謂卽汶江之沱夫復奚疑第水經有青衣水出青衣縣西蒙山東與沫水合漢志青衣縣下則有大渡水而無青衣水是漢志之大渡水卽今之青衣水也漢志之澁水卽今之大渡河也段君言凡唐宋史云大渡河者皆謂地理志之澁水宜閣下疑大渡河之卽沱也漢志與說文皆因其有異名故與沱分列後人遂不敢直指其合試觀澁水卽司馬相如傳之沫水而說文亦兩列豈得謂其非一水耶得閣下此論可以通班許二書之義而發其覆矣禹貢之潛亦有二鄭康成書注於荊州之潛云未聞象類而於梁州則云漢別爲潛其

穴本小水積成澤流與漢合大禹自導漢疏通卽爲西漢水也水經桓水注亦云自西傾至葭萌入於西漢卽鄭元之所謂潛水者也說漢水者亦頗紛揉我鄉金輔之禮箋謂西漢水鄭注以爲禹貢梁州之潛以上受漢別故得西漢水之稱後乃併其上流出嶓冢者名之爲西漢水矣義極通貫考西漢之名始見漢志隴西郡西下而唐以後則謂之嘉陵江閣下以嘉陵江爲潛自確不可易其謂梁州貢道浮沔溯褒以出斜口者殆亦卽水經桓水注所云沔歷漢川至南鄭縣屬於褒水溯褒暨於衙嶺之南谿水枝灌於斜川屆於武功而北達於

渭水也孫君疑酈氏謂沔渭相通恐未必是禹跡不知
經文不曰逾於渭而曰逾於沔入於渭必當時自潛逾
沔之地有捨舟陸行者傅氏寅曾有此說與酈氏上言

自西漢遡流而屈于晉壽界阻漾枝津南歷岡穴

纂言

岡穴卽郭璞所謂峒山括地志所謂龍山大石穴也其間自非水道相貫

迤邐而接漢沿此

入漾書所謂浮潛而逾沔者正相合至沔渭之間則有
褒斜可通故下又云水枝灌於斜川而總之曰水陸之
相關川流之所經復不乖禹貢入渭之字酈氏意蓋如
是漢武帝時議褒斜漕事而褒已不與斜通必自褒絕
水至斜間百餘里以車轉從斜下渭是乃陵谷遷變而

酈氏則猶追言禹跡也後代墾闢日滋近山之地沙石
所壅故道愈失非閣下身履其境固莫由洞悉形勢而
并史記言褒斜皆可行船漕者得彷彿其遺蹤耳九江
之說與三江同迄今無定論大抵曰潯陽曰彭蠡曰洞
庭閣下主洞庭而引山海經爲證宋羅氏泌亦曰山海
經洞庭之山在九江之中是前人已有所見及者獨釋離
騷哀郢篇當陵陽之焉至今森南渡之焉如以陵陽爲
東陵之陽實屬創見陽湖惲子居嘗言導水曰過九江
東迤北會於滙今彭蠡在潯陽南數百里以潯陽爲九
江則禹貢之文歧導山曰至于衡山過九江至于敷淺

原今衡山迤東北至敷淺原而潯陽在敷淺原之北西亦數百里以潯陽爲九江則禹貢之文益歧若彭蠡九水源委皆在揚州于荊州無可附會指駁明爽乃閣下之輔翼倘以至澧之文爲不可解則澧本非水名鄭注澧作醴云陵名也長沙有醴陵縣以陵爲名經自導弱水已下其言過言會者皆是水名言至于者皆非水名此固不足以相難也若夫黑水自先儒以來展轉推求尤莫得其真處閣下分雍梁及導川爲三此在胡臚明錐指已言之蓋三者欲混合爲一勢必穿鑿而難通也胡氏据水經注黑水出張掖雞山至于燉煌爲雍州之

黑水本相傳舊說又引薛季宣云黑水亦曰瀘水卽金沙江諸葛表所稱五月渡瀘者爲梁州之黑水江慎修謂其最確閣下亦從之惟導川之黑水求諸雍梁界內萬無可入南海之理於是杜氏通典遂謂其埋澗近人陸陸堂至引天問黑水元阨三危安在之語謂屈子卽不能知原屬渺茫顧復初亦闕疑不敢置論而王而農謂南海爲南河之誤江慎修謂南海爲西海之誤竟欲改經以就我錐指從程大昌謂卽滇之瀾滄江李元陽黑水辨吳任臣山海經注竝同然李穆堂齊次風號稱博雅俱辨之而李齊所自爲說則皆主潞江潞江水色

有積石之西南當黑水祠黑水出其南脇今中國無也夫鄭求黑水之入南海而及于滇池之黑水祠則固在雲南境雲南漢雖置益州而大半屬徼外蠻夷雜居故又云中國無此水則亦知此水絕遠不以當雍梁之黑水明矣是鄭意於南海仍謂大海而又不指滇池之停瀦者爲黑水也然則約其地勢不與閣下所云牂柯江出烏撒者略相似乎卽其釋三危山亦不用燉煌有三危之說閣下謂三危不止燉煌一處義亦合也特閣下稱黔水在南幹山脊之南與本卷內所列涪州之黔江明爲二水涪州之黔江前人已言之當卽說文溫下云

溫水出犍爲符南入黔水者考漢志犍爲郡符下云溫水南至鼈入黠水黠水亦南至鼈入江黠黔音同黠亦黑也水經於江水曰又東過枳縣西延江水從牂柯郡北流西屈注之枳縣今涪州治涪州城北有黔江南自貴州合諸水入焉亦曰烏江卽黔水也詳見水道提綱然說文不言黔水所入而漢志言黠水入江又烏江之水自西而東而北則是南幹山以北之水入江而非入海矣若閣下之定牂柯江入南海固前人所未及旣曩無確指自可以得諸目擊者爲准閣下所由欲與博雅比正之也凡上數條皆足祛先儒之泥滯備後學之考

稽細加推闡乃知龔序所謂時出卓見考庶幾在是顧此僅就珣管窺所及而陳之猶未離經生結習其餘隨地寓形務窮顛末而守疆之要便民之宜復間錯其中經猷閎遠於斯可徵當夫皇華載道暑往寒還舟車控僊塵泥翳濕波濤駭愕之時不意精力周澈乃爾殆具萬夫之稟諸君類能述初無煩珣之贅說矣本欲作序緣辭太覲縷與序體違故逕以書達每見前輩撰著友朋簡札多列首卷疎淺之談或幸甄採卽將此書當序焉亦可也閣下以爲何如講院課文視往歲爲繁披閱罕暇更有須引伸者倉卒不能盡朱珣頓首

承示蜀輶日記並蒙指出黑水入南海一條殷殷下問
所云黑水果經燉煌當積石東北縱能絕河而南亦斷
不能越中幹以絕江况能越南幹以入海等語足破千
古之疑曷勝欽服夫黑水旣屬黔之烏江不惟於八南
海之說可據卽至於三危與竄三苗於三危之經文尤
徵左券按黔書云牂牁江卽今日之烏江自遵義湄潭
至印江入思南城西之巴江水此一說也黔書又云史
記牂牁江廣數里出番禺城下後世求其地而不得遂
以爲在定番南源出蒙潭流入破蠶至泗州城通番禺
入南海論者謂且蘭卽今之遵義夜郎卽今之桐梓武

蜀輶日記吳書

八

帝欲以夜郎兵十萬浮舟牂牁制越若泗城之水僅僅
一綫何以浮樓船十萬之師爲疑遂以牂牁舊治不在
巴江必在印江此亦一說也榮光歷求其故於乙酉歲
歸省由黔至粵水道證而得之榮光赴粵時由古州三

腳壘買舟卽都江水發源都勻此黑水之支也時屆隆
冬急波一綫僅可容舠迨入鬱川漸平而廣歷柳潯梧
三府之潭江潯江融江灘江直達粵之肇慶廣州番禺
入南海實爲漢武帝徵兵夜郎伐粵之道然則黔書所
云僅止一綫或今昔情形遷變不一耳總之牂牁在思
南上爲烏江下爲盤江直接鬱水大禹時本未有定名

以其色黝統目爲黑水漢書郡有牂牁江通番禺城最
爲的據曰烏曰盤曰鬱亦皆以其色爲後起之名曰潯
曰潭曰灑曰灘尤支流中後起者禹貢黑水實爲黔粵
之水非金沙滇珥也明矣管見所及並用陳覆吳榮光
頓首

蜀輶日記卷一



安化陶 澍雲汀

嘉慶十五年庚午夏五月十五日臣陶澍奉 命偕

編修史評號松軒山東樂陵人戊辰進士典四川鄉試同日被

命者廣東主考史編修譜松軒族兄胡編修承琪福建主

考周編修壽椿程編修德楷湖南主考程員外祖洛

沈中書欽霖廣西主考彭編修邦疇賀編修長齡凡十八

二十九日庚午午刻啟行連日大雨淋漓是日天色開朗出城望西山一帶蒼翠欲浮路旁柳色如畫十五

蜀輶日記卷一

一

里大井十五里盧溝橋橋建於金代水即永定河色黑故名盧又曰渾河五里尖長新店廿五里宿良鄉

縣夜復雨 先是余與松軒昆仲及張編修源長孫

編修申長二君次年分校會開陳編修官俊本年分校順天鄉試為文酒

之會諸君皆山東人又與同鄉彭修撰浚次年分校會開何

編修凌漢歐陽戶部厚均聶編修銑敏本年主考貴州石編

修承藻本年主考山西及賀編修長齡為詩酒之會此次奉

使十人居其四而余與松軒同行諸君尤詡之劉編

修嗣綰贈詩云羨君歸路空船峽畫裏人傳郭李舟

同時諸君送行多佳唱而洪介亭編修本年主考陝西云人

海驚心嗟我老名場墮淚似君多又云歸日浣花祠
下拜詩人難得此經過謝向亭編修云此邦尚有凌
雲氣我輩毋忘勒帛時數語尤爲實獲我心也

三十日大雨水深沒軌申刻夫馬始集行不數里大雨
漫山而至暫避道旁古廟席地坐片刻秉燭行泥淖
中通夕未歇凡二十五里至寶店十五里過琉璃河
金史謂之劉李河卽聖水也三十里過涑水一名巨
馬河

六月初一日卯刻抵涿州以涿水得名古涿鹿唐范陽
也一飯卽行五里過忠義店張桓侯故里有廟居民

蜀輶日記卷一

二

多張姓自言侯裔午刻與松軒騎馬同行夕陽鞭影
搖曳於深柳中凡十五里至松林店又十里入定興
界十五里高碑店廿五里宿定興縣

初二日發定興十里渡白河古督亢水也此水以南爲
戰國時趙地水經注督亢水又南謂之白溝水或曰
卽易水也稍西三里許地名東引村有楊椒山先生
墓萬曆三年孫尙書丕揚立碑子孫皆在容城又南
岍有椒山先生祠明天啟中張中丞鳳翔因巡檢舊
署爲之嘉慶壬戌鉛山熊謙山師總督直隸爲之立
碑又十里入安肅界又二十里故城鋪西望易州一

帶山勢崑崙峭拔如花如火

世宗秦陵

今上壽域皆在焉龍虎森嚴靈氣所鍾甲於寰區矣
又三十里宿安肅縣

初三日晨發二十五里天色始靄渡曹河憇南岸慈航
寺方恪敏公觀承所建方微時流寓寺中及總督直
隸遂崇飾之有老僧年七十餘自言任邱邊氏子嘗
居京師崇效寺頗善繪事引與觀寺內竹石條然有
林下致廿五里抵保定府清苑縣直隸省會也秦爲
上谷宋曰保州趙氏世籍清苑宋之僖順翼三祖陵
皆在縣之東境建隆初置保塞軍爲防邊要地易州

既沒於是廣植樹木以限契丹童貫伐之而敵騎南
下矣地居衝要今爲股肱郡拱衛神京迥非往日
論都之比也縣以水得名有清苑河在城西里許一
名沉水源出雞距泉在小東至黃狗窰與順水合

初四日發清苑縣二十五里入吉店入滿城界二十里
涇陽驛十五里方順橋濡水所經也一名順水又名
祁水發源完縣於城北曲而西流故曰曲逆左傳齊
國夏伐晉取逆時卽此漢章帝元和二年以曲逆名
不善改曰蒲陰後人又改爲方順蓋曲逆之反也十
五里入望都界十五里宿望都縣城東南隅有堯

廟內有大塚卽堯母陵古木頗多蔚然深秀堯母號
慶都故縣以名焉乾隆十一年十月 駕幸五

臺山

迴鑾駐此改今名

初五日四鼓卽發三十里清風店入定州地十五里渡
唐河卽澹水也源出山西靈邱縣十五里尖定州古
中山國後燕慕容垂都此唐爲博陵郡宋置定武軍
西門內有土阜或云中山以此得名旁有中山靖王
墓又城西路旁有土阜三堆獨高起謂是靖王三子
墓也靖王有子百二十餘人此三子獨有墓何歟二
十五里明月店西望恰見嘉山又西爲倒馬關內三

蜀輶日記卷一

四

關之一二十五里宿新樂縣漢成帝時中山孝王爲
其母作樓閣於此因名西樂里後訛西爲新也館人
云縣境甚旱昨復大雹吁可怪已

初六日晨起渡沙河一名浩河四十五里尖伏城驛伏
羲生此因名入正定界聞日前雨雹有被擊死者午
刻騎而行四十五里抵正定府古鮮虞地漢爲恒山
郡避文帝諱改常山唐曰鎮州爲成德軍治宿隆興
寺寺昉於隋開皇中釋子澄空捨身鑄佛後周世宗
毀以鑄錢宋太祖復之今佛香閣銅像觀音是也像
高七丈三只登閣至第三層始見菩薩正面莊嚴妙

麗兼而有之旁立二侍者亦高及其肩其名曰優婆
塞優婆夷按北魏書釋道志流俗之酷信道法者男
曰優婆塞女曰優婆夷猶華言信男善女也菩薩舊
有四十二臂乾隆中 勅令解脫閣上額調御

丈夫四字

聖祖御筆也碑碣頗多有隋開皇

中碑一通最古撰文及書丹人姓名皆剝落不可識
蓋卽曝書亭集所跋隋碑謂寺創於開皇六年恒州
刺史鄂國公金城王孝僊立石齊開府長兼行叅軍
九門張公禮撰者也爾時碑猶未殘缺故竹垞識之
寺入 本朝康熙四十二年 勅加修葺乾隆

蜀輶日記卷一

五

四十四年復

命發帑金十餘萬修之頃有

旨來春

巡幸五臺

蹕路所經重加修飾猶

未竣工云

初七日出西門十里渡滹沱河卽禮記惡池周禮虜池
也源出山西繁峙縣秦戲山流一千三百餘里至天
津入海渡河二十里趙陵鋪趙佗之祖墓也入獲鹿
界三十里宿獲鹿縣縣枕蓮花山自此入太行山峽
矣夜大雨

初八日晨起雨猶未歇出郭五里過土門口杜子美垂
老別所云土門壁甚堅也元和郡縣志謂卽古井陘

口爲太行八陁之第五陁五里入井陘界踰梁于嶺
過抱犢山麓又過白石嶺有樓揭東天門三字峪岓
甚險凡三十里至微水舖一名洪口源出平定州之
樂平鄉史記淮陰侯傳未出井陘口三十里止舍夜
半發傳遣人持赤幟間道望趙壁以地勢考之正在
此處飯後涉綿水卽澤發水凡三渡共行三十里宿
井陘縣燕趙之間謂山脊爲陁其山形如井故名穆
天子傳謂之劔山也縣倚山阜往往聞虎豹聲綿水
繞其三面源出平定州經娘子關而來合微水入於
滹沱也綿水一名綿曼水又名鹿泉水是日輿前始

用緯人挽之如舟行

初九日出東門復渡綿水轉入山徑十里板橋十里過
龍窩寺至黑桃園十里舊關卽故關唐裴度出故關
討王庭湊是也自此入山西平定州界石堡崔嵬踞
山坳亦要害也五里甘桃驛換馬五里固關重巖疊
嶂壁立摩天小城跨其間繚繞達於山顛北接娘子
關相去不二十里固關古井陘關出關望巖壁尤峭
遵谿行登頓礫間有日閣王臺小鬼寨者每多覆
車之患凡三十五里出西天門宿柏井驛宋史金史
地理志皆作百井

初十日出柏井溪行多石微雨從林際來霏微若霧出石門口過西郊鋪桃水合流趨娘子關變名爲綿水矣凡五十里宿平定州平定并州地漢曰上艾魏曰石艾宋初取北漢地置廣陽縣後改平定軍其南鄉廢樂平縣地卽古皋落之戎也

十一日出西門五里黑煞嶺俗名南天門山中產鷓鴣健鬪異於他產十五里義井鎮自此行水中或揭或厲有七十二渡之稱又三十里尖側石驛本樂平縣地廢入平定州驛歸盂縣協濟十里入壽陽界十里張淨鎮十里芹泉驛地有二泉一清一濁平定桃河

蜀輶日記卷一

七

之水發源於此換馬過黃土嶺崩洪剝落中抽一綫以分水觀之知爲北幹龍過峽出脈之所矣凡二十里宿壽陽縣春秋晉馬首邑魏獻子使韓固爲馬首大夫是也東關外有妣廟蓋八蜡之神又有韓文公祠公使鎮州夕次壽陽有詩

十二日十里黃門鎮古狄那村二十里清平鎮涉水凡數次壽陽之水名洞渦源出廢樂平縣之西陡嶺至是合盂縣之水西南流至榆次入汾二十里太安驛有石亭刻絕句一首云風光纔動別長安及到邊城特地寒不見團桃兼圍杏馬前惟有月團團蓋韓文

公奉使諭王庭湊時作亭建於乾隆四十三年戊戌
余生之歲也二十五里入榆次界又五里尖什貼鎮
五里三岔口北通山西省城相距僅兩舍南行三十
里宿王湖驛距榆次縣治五里宋太平興國中太原
旣下於此立新并州

十三日四十里尖永康店十五里入徐溝界汾水北從
靜樂縣之管涔山流經太原府城西至縣境之清源
鄉洞過水自壽陽來注之一名同過水十五里宿徐
溝縣西望可見懸壘山晉水所出有晉祠太原縣地
十四日二十里堯城有帝堯廟十里同戈站蓋因同過

蜀輶日記卷一

八

水得名而訛入祁縣界十五里賈令鋪昔叔虞少子
封此曰賈伯曲沃武公滅之其後封狐射姑爲食邑
謂之賈季舅犯其父也有故里碑十五里祁縣有祁
奚墓二十里入平遙界十里洪善鋪二十里宿平遙
縣古陶邑帝堯初居於此陶氏得姓所自始也漢曰
平陶後魏避太武諱改焉按字書皋陶之陶餘昭切
陶唐之陶徒刀切觀縣名改陶爲遙又統志載清源
縣有陶唐城俗謂之姚城是陶唐之陶亦可讀餘昭
切也麓臺山在縣東南汾水繞其西昔漢文帝國此
曰代後稱中都括地志謂中都故城在平遙西南十

二里本屬太原郡也

十五日二十五里入介休境十里張蘭鎮商賈頗輻輳
爲晉省之冠四十五里宿介休縣北關外有郭林宗
祠墓隆慶中興國劉旁立碑祠前漢槐一株大數圍
孫株茁其腹中亦合抱矣蔡中郎碑已無存太原傅
青主山秣陵鄭谷口盩補書之皆用漢隸鄭碑書於
康熙辛未傅碑不署欵亦無歲月人多誤指爲中郎
書細尋碑陰有茹謙小記數行言公佗先生自太原
過此補書郭有道碑命茹生鈎之離石王良翼鐫石
以此知爲青主書矣城內有文潞公故居子孫歲時
奉祀介休以北多水田相傳潞公引石洞水爲渠灌
田九十餘頃至今爲利石洞水出於洪山在縣之東
角卽山海經之狐岐山氣象頗蒼鬱其南一丈綿亘
紆徐直接靈石所謂綿上聚晉文公以封介子推爲
墓田者也

蜀輶日記卷一

九

十六日二十里義棠鎮入靈石界有冷泉關卽水經注
所載寇爵津也又名雀鼠谷自此濱汾河行崖頽浪
激羊腸繚繞蜀中左擔道想亦不過如是三十里尖
兩渡鎮東岸卽綿山有小路至介之推廟不過數里
三十里宿靈石縣縣故介休地隋時有文石浮水中

因名聞其石尙存庫中崇山複嶺人皆穴居山無完膚焉

十七日二十里過韓侯嶺其顛有淮陰侯墓巋然而高漢高帝征陳豨自代還駐於此適呂后函侯首至遂葬焉墓前有祠石刻頗多惟吳逢聖一聯云十年成敗一知己七尺存亡兩婦人惜全首未稱二十里下嶺尖仁義驛宋史楊廷璋傳周世宗時以兵七千入太原拔仁義砦是也驛係浮山岳陽孝義汾西沁源五縣協濟十里逍遙嶺入霍州界五十里宿霍州是日所行皆坡坨險隘翹首見東南一山氣勢峻拔黝

蜀輶日記卷一

十

然有光意必中鎮霍山也問之良然

十八日晨興出南門望霍山半立雲中山勢南去起落不羣霍山一名霍太山又曰太岳禹貢至于岳陽又曰至于太岳卽指此上有赫連勃勃墓又有蜚廉墓史記蜚廉爲紂石槨北方紂死爲壇霍太山而報得石棺銘曰帝令處父不與殷亂賜汝石棺以華氏死遂葬於霍按此蜚廉卽造父之祖與周師所驅戮死海隅者別自一人雖同時事紂而忠奸不同從前認爲一人殆誤矣五十里尖趙城縣周彘邑造父封於此爲趙之祖北關外有藺相如故里南關外有豫讓

橋又曰國士橋城東五里有媯皇廟三十里宿洪洞縣縣南有洪崖高踰百尺東西袤五十里澗水出焉又名洪洞嶺縣以得名古楊侯國晉滅之以賜羊舌氏爲食邑也九箕山屹立治東蓋霍太山之支絡是日數見汾水洪趙之閒田渠灑灑灌溉甚饒其水皆出自霍山引爲南北二渠

十九日出南門渡石梁而西十里皋陶廟五十里尖平陽府臨汾縣帝堯故都春秋爲韓邑劉淵僭號亦居此披山帶河歷爲重鎮城東十餘里山麓有堯陵明嘉靖中置守陵戶堯陵舊傳在濟陰又云在濮州雷

蜀輶日記卷一

十一

澤一云在城陽穀林又云在東平州迄無定說其爲山東地則一也以理斷之堯老殂落應以平陽爲近平陽號富饒地然城中荒陋人迹亦稀想見茅茨土階之遺風出南門七八里許有堯廟舜廟頽落甚四里至趙曲鎮襄陵地二十里宿史村鋪太平地西距縣治三十里稍北有巢父洗耳處西北有姑射山日晡熱甚自太原而南左山多聳拔右山多平迤汾流其間日行見之至平陽城北遂不見蓋西南逕沃絳河津以入於黃河矣

二十日二十里入曲沃界有義士橋亦以豫讓得名按

呂氏春秋趙襄子游於囿中至於梁馬却不前使青
莽進視梁下豫讓佯死叱青莽去之青莽曰子將行
大事而我言之是失友道子將賊吾君而吾不言是
失臣道乃自殺趙城國士橋距城最近不應有囿此
處頗有邱壑以呂覽證之近是矣五十里宿侯馬驛
曲沃地有水曰澮河源出翼絳之間西入於汾亦謂
之少水傳所謂汾澮以流其惡者也驛西北距縣治
三十里曲沃古新田聞喜則古之曲沃也

二十一日晨大風行二十餘里至隘口越山而南蜿蜒
曲折羣阜蒼然午尖董鎮左傳董澤之蒲杜預謂聞

蜀輶日記卷一

三

喜東北有董澤陂又名參龍池卽舜賜董氏參龍之
所其後有關龍逢諫桀而死關卽參音之轉也以復
改單故關龍爲關氏矣解梁之關蓋原於此晚宿聞
喜縣卽太甲所居之桐也晉曰曲沃漢武帝幸緱氏
至此聞南越破改縣曰聞喜晉郭璞宋趙鼎皆縣人
而唐裴氏五房十七相尤爲衣冠之表城內有裴晉
公故里碑子孫猶居焉是日行八十里抵傳舍大雨
二十二日出城見涑水水經注涑水出聞喜縣黍葭谷
謂之華谷然其上源實從絳縣山中伏流盤束而來
至聞喜始出而西流又南逕夏縣安邑猗氏至臨晉

界合姚暹渠而西入于河也三十里尖水頭鎮夏縣地過涑水橋有司馬溫公故里碑三十里將軍廟三十里宿北相驛安邑地西距縣三十里後魏之南安邑也禹故都在今縣北三十里夏縣界謂之夏王城卽鳴條岡成湯放桀於此有虞帝陵高三十丈有祠禮記言舜葬蒼梧之野孟子言卒於鳴條未知孰是安邑又有漢前將軍關壯繆故居在常平村與解州接壤先塋在焉是日泥滑甚晨起冒雨行不數里輿夫屢蹶乃舍而騎望中條諸山在烟霧中忽隱忽現沿路補種秋苗皆欣欣有向榮意自保定以來所見

蜀輶日記卷一

三

皆旱連日得雨殊可喜安邑有鹽池在縣西南解州界近安邑者爲東池近解州者爲西池實卽一池東西長五十五里周百四十四里深數仞或曰海眼也北有堯梢水又名巫咸河一曰無鹽河此水入池則鹽淡故爲渠引使西而捍之以堤蓋隋時都水監姚暹所浚故以名渠相傳池遇南風則鹽利必倍舜歌南風之時兮可以阜吾民之財兮或云卽指此

二十三日三十里尖游杜鎮猗氏地猗氏文王子郇伯所封春秋爲晉令狐邑秦始皇以猗頓居此改今名漢高祖封功臣陳遯爲侯邑四十里宿樊橋驛臨晉

地西距縣治三十里古解梁也有司空圖故里碑本
傳柳璨希賊意召圖入都陽墮笏意趣野耄乃聽還
山圖本居中條王官谷遂隱不出作亭曰休休悉畫
唐興節士文人於其中作文以見志云先夜雨淋漓
比曉路滑仍與松軒騎行東望中條雲氣甚密時露
三兩峯西望亦有山矗立空際殆峨嵋嶺也中條狹
而長居太行華岳之中故名厯山在其東南瀉汭水
出焉午後雨霽登驛樓四顧覺元人詞四圍山色中
一鞭殘照裏恰肖蒲中風景

二十四日過荆中丞道乾墓中丞曾宰善化麻陽等縣

蜀輶日記卷一

十四

廉能聲甚著仕至安徽巡撫七十里宿坡底蒲州府
永濟縣地西距府治五里舜所都蒲坂也古河東地
春秋時晉獻公以封畢萬爲魏唐設河中府中條厯
山峭立蜿蜒黃河包其前與秦壤相望儼然天塹故
厯代皆爲重鎮是日晨晴抵傳舍復雨

二十五日繞府城而南路滑穿柿林中久之達中條山
麓四十五里尖隘河卽舜所漁之雷澤也在首陽山
下首陽居雷首山之前故名其陰有桃花溪李義山
故居在焉今爲永樂鎮首陽有夷齊廟問之輿人皆
不知但云有二仙廟一老者云二仙卽夷齊蓋自釋

老之說始凡山林佳處率爲所據卽前賢遺跡偶有所存愚民不知不以爲佛則以爲仙正不獨杜拾遺訛爲杜十姨也安得狄梁公起而正之乎隔河望華岳在雲氣中依稀可辨二十五里抵風陵口稍上有沙堆風后所葬或曰女媧墳女媧風姓故名風陵也渡黃河宿潼關入陝西境 山西省左山右河氣聚而奧古言表裏山河又曰天下莫強然地勢南北長而東西甚狹太原以北逼近邊塞成周時猶勞薄伐平陽以南氣局稍舒綿介霍岳爲之障蔽汾繞其間以流其惡故堯都於此舜禹愈徙而南蓋沈灾旣澹

蜀輶日記卷一

五

降邱宅土蒲解濱近大河便於貢賦耳通計晉省崇巖疊嶂地氣苦寒可耕之田甚少其民仰給於直隸秦豫而又舟楫罕通常憂乏食是以堅忍嗇克儉不中禮藉商賈爲生蓋地勢不得不然非盡關風氣也粵自元海竊據五部迭興索頭繼起并冀受毒尤深民多非舊至其質直堅凝沉強好義則所謂瘠土之民多思自古有然矣

二十六日早發潼關古桃林塞也背山臨河全秦門戶古函谷關在其東漢代移置於此建安十六年曹操擊馬超於潼關其名始見蓋秦之函谷專以防東諸

侯此處兼可防北形勢尤扼要潼關今設廳員所轄
城外僅五六里其民與地在河南之盧氏閩鄉出潼
關西上里許卽華陰地過四知坊拜楊震墓本傳所
謂潼亭葬時有大鳥立墓前者也三十五里憩華岳
廟古木參天有老槐茁柏腹中尤奇大可數圍柏縷
其外枯皮僅存相傳老子出關繫青牛其上語雖無
稽然霜皮溜雨閱世已久抑安知其非然耶又有朽
柏一株以鐵束之其頂偃卧茁青翠數點僧言柏久
槁至 國初復榮其餘柏樹多揭周秦字樣大都千
餘年物也石碑數十通刻祭告文辭左廊有乾元元

蜀輶日記卷一

六

年顏真卿書尤蒼勁其碑頗巨四面刻字正殿之後
有院院後有放生池其後爲萬壽閣極軒敞北臨渭
水又北爲黃河縈複若衣帶隔河望中條首陽歷歷
在目宛有吾鄉岳陽樓風景南望華山帝座微茫彷彿
可通其形壁立若困惟西北山脊一綫可脈而上
峭厲之氣令人肅然南峰最峻卽落雁也上有金天
宮其西北曰毛女峰東北曰雲臺峰又有公主峰相
傳漢南陽公主避王莽亂入山得仙處也華山以蓮
花落雁玉女三峰著名其實東西南北中皆有峰故
曰五華少華在其西故又曰二華華嶽志云嶽頂中

峰曰蓮花峰東曰仙人掌西曰巨靈足羣巒相續環帶終南以衡山七十二峰例之當亦不下數十峰惟中間數峰陡峭森嚴無所因依若特起然山海經云太華之山削成而四方高五千仞廣十里遠而望之若華可謂曲盡華山之妙後人極力描寫不能肖也望華山必以深秋澄霽始得真面目夏月雲氣瀰漫明窗祕鑰無由啟扃時或天龍一指偶現元神終非全諦連日雨漬霾深指眼神山杳如海上先夕旅館挑燈齋心默禱冀邀山靈之一顧追曉紅鉦高掛晃晃雲端少頃抵山麓浮埃盡掃萬里無纖翳矣仰見

蜀輶日記卷一

七

突兀承於眉睫乃舍輿而騎傍山西上俯仰曲折一心領神會輿夫皆驚詫以爲盛夏時從未見華山如此清爽也昔韓退之問世豪傑故能開衡山之雲不佞何人獲邀靈貺可不勉乎哉梯樓而下周歷兩廡皆貌仙女持旄秉笛最後爲嶽游坊有明太祖夢游華山記辭甚峭岬其前恭懸

聖祖

高宗御書匾額又觀唐太宗掛甲樹已朽折僅留樹根尺許出廟西行五里頓華陰縣三十里過敷水鋪水出羅敷谷秦嶺以北之水會於此又北會於渭二十里入華州界有紀信廟二十里宿華州郭汾陽故

里有廟又有希夷先生墜驢橋搏言陳搏乘白驢入
汴聞太祖登極大笑墜驢此處橋名殆傳會又按晉
天福中賜華山道士羅隱之號希夷先生是圖南之
前已有一希夷先生居華山也白華陰而上沿路稻
畦水瀲灩流垂楊深樹閒山懸瀑布望之灑然漁洋
所稱二十八潭天上落者也華州古咸林地鄭桓公
初封於此南對烏雲山東南見少華一角矗出若可
仰拾

二十七日四鼓出華州西郭恍忽見寇萊公故里碑過
西溪舊有亭杜子美詩雲斷岳蓮臨大路是也又有

蜀輶日記卷一

六

齊雲樓唐昭宗嘗登之以望西京今俱廢西溪有小
曲江之目黑夜過之不及詳也四十里古橋鎮入渭
南界南望可見藍田諸山赤水從南來入渭十里尖
渭南縣古下邽地渭水繞縣後漁汀烟樹渺然有滄
洲之趣過白香山書院有墓在縣北紫蘭村按賈氏
談鋒白傳葬龍門山河南尹盧真刻醉吟先生傳立
於墓過之者必奠以卮酒塚前方丈之土皆成泥是
白墓在洛陽此處所傳或傳會也出城過首水卽酒
水也西南數里有灰塹崇三十尺周百步俗傳始皇
焚書處渭南舊有金氏陂雍大記云金日磾薨賜葬

地於此按本傳日磾薨賜葬地送以輕車介士軍陳至茂陵是日磾不葬渭南明矣此蓋當時所賜陂池也四十里臨口入臨潼地二十里新豐古酈邑漢高帝爲太上皇作此徙豐人實之因改名稍東里許鴻門坂有張良樊噲廟驪山當其前山麓有大塚若阜秦始皇墓也三輔故事始皇葬驪山起墳高五十丈下周三泉周迴七百步二十里宿臨潼縣縣對驪山之首館舍在山之腹凡三進中有複道飛梁花木蔚然卽唐華清宮故址或曰故九龍殿也左廊下有香湯方石爲池長一丈廣三之二竅石以吐水汨汨然

蜀輔日記卷一

九

來浩浩然去因解衣入浴磅礴良久拂拭而出呼奴攜几坐中庭丁香花下翠竹盆松兩旁羅列引首望繡嶺古柏滿山濃翠欲滴山林泉石不謂於此間遇之廊之左爲古溫泉有亭覆之其廣數倍於香湯壁間多石刻以張燕公溫泉箴爲最古雍錄載笋殿側有魏刻溫泉頌其石瑩澈見人形影謂之玻璃碑又宋蔡京書朝元閣三大字皆無存亭之左爲

御泉

聖祖西巡所浴也其前有太子泉水尤

熱按賈氏談錄溫泉比十八所第一是御湯周回數丈砌以白石瑩澈如玉而皆隱起魚龍花鳥之狀四

面石坐階級而下中有雙白石蓮泉眼自甕口湧出噴注白蓮之上臨潼志長湯十六所在笋殿之北又云由蓮花湯而西爲日華門門之南爲太子湯次西少陽湯又西尙食湯又西宜春湯又有海棠湯在蓮花湯西俗呼楊妃賜浴湯亦曰芙蓉湯又梨園北有小湯今多不可識矣惟香湯有役守之非貴人不得浴古溫泉則無人不浴其中又一泉坎牆外且澣且灌水暖利於蔬以故城南彌望皆圃也又西流里許合於潼守者言山泉至冬倍溫惟不可飲飲之作硫黃氣浴則不覺蓋其下有丹砂硝磺之類使然昔蘇

蜀輶日記卷一

二十

子瞻謂天下溫泉七惟驪山居勝絕而坐明皇之累以爲抱器適用不擇所處之戒云

二十八日繞繡嶺坡路而西十里有唐太尉段秀實祠墓南望藍田山色蒼然直接終南東北有峰尤峻立儼如砥柱知是華山之南面也二十里渡灞水古滋水秦穆公更名爲霸舊有橋曰銷魂已圯數日前暴漲船隨浪去以八人肩輿而過十里渡漣水水西北流至漢文帝陵前與灞水合東入於渭十里至西安府長安縣陝西省會也周秦漢逮隋唐皆都於此故城在稍北二十餘里今城爲長安咸寧二縣地周圍

僅廿里古蹟荒廢惟碑洞在府學旁石刻尙有存者
二十九日留住長安收拾

七月初一日西行四十里經通天臺七里渡灃水淺流
澄淨水波不興三里渡渭水源出臨洮濁流甚駛按
關中之水灞澮皆出藍田灃澇皆出鄠縣涌出杜陵
瀉在昆明池北此六水皆發源終南山之麓北流入
渭惟涇水出涇陽笄頭山南流至畢原入渭古云涇
以渭濁謂涇本清也乾隆庚戌 高廟因讀邨

風疑朱註有誤

特命陝撫秦承恩由陝溯甘

親履二水之源旋據覆奏實係涇清渭濁辨析甚明

蜀輶日記卷一

三

御製詩有偽清乃誠濁祛濁始真清之句仰

見

聖人研經汲古之精如此登岍卽咸陽縣

本秦都漢改渭城北有畢郢原文武成康周公太公
及漢高惠昭元四陵皆在焉歷代王公將相葬此甚
夥癸辛雜識咸陽有六岡象乾之六爻故曰咸陽是
日天氣晴和而爲游氛所隔四望不見一山龍首三
閣之勝柏臺花萼之遺杜陵韋曲之原樊川漢陂之
水皆以意度之而已

初二日夢哭周氏妹失聲悽愴周氏妹卒於去秋家人
遲遲乃告四月內余始得書欲挽之以詩哽咽不能

成章晨起出咸陽西郭薄霧中見紫閣白閣黃閣約略如螺不甚了了二十五里馬跑泉二十五里宿興平縣周犬邱懿王所都秦廢之故曰廢邱項羽封章邯於此爲雍王漢二年六月引水灌廢邱邯自殺更名廢邱曰槐里也漢時京兆馮翊扶風謂之三輔共治長安城中至後漢扶風出理槐里其地在今縣治東南七里縣有漢武帝茂陵東關外有秦文公墓按史記文公葬西山皇甫謐云在今隴西之西縣不知此處何以有墓

初三日三十里馬嵬坡本馬嵬所築地以人名也晉書

蜀輶日記卷一

三

姚萇傳扶風王驎以千人保馬嵬卽此楊貴妃墓在路北尼菴後畢秋帆尙書撫陝嘗葺焉相傳每歲七月七日五更時有白氣出塚上凝結如珠以治婦女癩點立愈謂之貴妃粉云按舊唐書貴妃葬馬嵬驛西道側上皇自蜀歸密令中使改葬他所肌膚已壞惟香囊尙存上見之悽惋是妃業已遷葬此但權厝耳過馬嵬題詩者多矣輿中戲占一絕云祿兒反骨本天生花貌何須罪太真不見他年藍面鬼也教天子遠蒙塵詩涉遊戲不可入集然李義山驪山詩未免被他褒女笑祗教天子暫蒙塵其戲殆有甚焉聊

記於此以備一粲十五里尖扶風鎮四十五里渡漆水宿武功縣后稷初封之郃也姜嫄墓祠在上南門外旁有后稷祠又唐太宗生於善慶宮卽城南之慈聖寺或曰太宗生處在今之扶風漢蘇子卿明康對山皆縣人城小如彈丸西倚高原雍大記云武功古麋邑古武功今郿縣地

初四日彳于坡隴閒三十里至杏林舖其南有三時原卽秦所作郿時密時好時也三十里食扶風縣城如武功西北倚原東南臨水其流甚小南與漆合又南入渭也城東有絳帳村西有伏波村班家臺馬援馬

蜀輶日記卷一

三

融班彪父子皆縣人又苻秦時有安南將軍竇滔娶扶風蘇道質第三女曰蕙滔鎮襄陽獨與寵姬趙陽臺同行蕙乃織錦爲迴文計八百餘字縱橫反覆成詩七千九百五十八首名璇璣圖以寄滔滔感而迎之今城北織錦巷其故居也出郭望西南山色皓然傳言武功太白山去天三百春夏積雪不消以此知爲太白山矣太白水經注謂之太乙古文以爲卽是終南潘岳關中記謂中南也北望五將山連綿而西與梁山岐山蒼靄相接六十里宿岐山縣治在山之南麓周舊國也西北十里有周公廟岐山童禿無草木

東坡謂其風物可慙蓋靈氣發洩盡矣其西有三龍山後周於此置三龍縣

初五日循岐山而西五里鳴鳳岡有太伯廟碑在道旁四十五里鳳翔府鳳翔縣東關外有弄玉吹簫臺周宣王石鼓舊在鳳翔府學內元時移置北京卽今太學大成門內所藏是也字蹟泯滅僅存三百十字乾隆中

高廟重加編次成詩十章刻石大成門外鳳翔故岐周邑孝王以封非子爲秦古雍州地也是日館東湖蘇公祠有王蘭泉宗伯昶所畫東坡三像刻石壁間祠內松柏甚茂蘇公重九不與府會游

蜀輶日記卷一

三

至此有懷子由一詩石刻尙存詩曰花開酒美曷不醉來看南山冷翠微憶弟淚如雲不散望鄉心與雁南飛明年縱健人應老昨日追懽意已違不向秋風強吹帽秦人不笑楚人譏按公以嘉祐六年簽判鳳翔治平二年罷判登聞鼓院來時年甫二十有六去時年三十耳而云明年人應老當是爲陳公弼所扼故辭氣憔悴殺如此僕今年三十有三視公作詩之年則已過之讀此淒然念舍弟子晉南北隔別三年亦不覺有淚如雲也因次韻和之東湖源出城北鳳皇泉流經東關外坡詩東去觸重阜盡爲湖所貪是也

湖寬可十畝葦楊蓼芡點綴其閒殊有江湖之趣中
央有亭曰宛在亭中題咏頗多惟海岳游人張開東
五律六首最佳題曰乙未冬東湖館次卽景答主人
詩不失盛唐家數附錄二首於此老樹依人立天寒
不著青疎枝橫兩岸落葉下孤亭水閣樵兒徑霜洲
浣女汀朔風吹浪急南浦聚浮萍太守辭林壑諸公
隔廟廊時來車馬迹偶過水雲鄉別去如千里溯洄
此一方何時春漲綠重宴共流觴張君不知何許人
容當物色之

偶與京尹李小松先生談及李云張開東蒲圻詩人也嘗徧游五岳夢華山神向之索賦自號海岳游人有白菴集大典朱文正公作序推服甚至云癸酉補記於此

蜀輶日記卷一

三五

初六日五鼓穿城南去舊傳秦穆公墓在城東南隅橐
泉側黑夜不及訪陳倉山矗立西南爲隴蜀要害六
十里渡汧水尖底店汧水西北自汧縣小隴山來至
此與渭水合烟樹間微露朱欄碧瓦有石刻太公釣
魚處又揭飛熊在望四字山上有太公廟也稍南卽
磻溪溯渭西上十五里涉小水僅如一渠路旁有碑
謂卽金陵河十五里宿寶雞縣古陳倉也昔秦文公
居此獲陳寶石雞縣因以名焉土城倚山狀若屏風
南望羣山簇湧如刀箭攢空西望亦多崖岫又西二
十餘里至陸川則秦地平川盡矣金臺觀在城東北

山上相傳張三丰嘗隱此三丰號邈邈遼東人或云
平陽人一云卽寶雞人是日熱甚晚乃雨

蜀輶日記卷一

三